

A pidi nueve año pa tata cu abusa di su yiu muhe menor di edad

DIABIERNA mainta den Sala di Corte di Prome Instancia, tabata reina un silencio profundo caminda mayoria di esunnan presente, a keda impresiona y sin duda afecta pa loke e cargonan cu Ministerio Publico a presenta contra di e acusado R.J.

Ta trata di un acusado cu Ministerio Publico ta acusa cu pa un periodo largo, for di 2015 te cu 2023, pues ocho año largo, a tene relacion sexual cu su propio yiu muhe di apenas cinco año, mustrando un falta di respet total pa su propio sanger.

Hopi hende den sala di Corte ayera mainta, a sinti nan mes afecta pa e caso horendo aki, caminda un tata cu den bida di su yiunan mester ta e figura principal den nan proteccion, a bira abusa di su pober yiu na un edad asina "muchu" di cinco año.

Un edad caminda e pober criatura aki lo no tabata sa kico e tata tabata haci cu ne pero na momento cu e victima a crece y bira mas grandi, el a conoce mas di bida, hayando conocimiento di bida, a bin haya sa cu loke su tata tabata haciendo, no tabata corecto.

Na momento cu su mama a ripara comportacion straño di e mucha, el a papia cu e pober criatura kende dado momento a spanta e mama door di expresa cu e no tin smaak di biba mas loka a habri caminda cu a conduci na detencion di R.J., un homber grandi y scapa.

Durante tratamento di e caso hopi tristo aki, e victima no tabata presente pero sin a formula un carta cu su mama kende si a atende e procedura, a lesa pa hues y tabata expresion cu ta duna un bista con horibel bida di e pober criatura aki tabata na momento cu el a haya conocimiento suficiente pa por a dicidi si loke su tabata tabata haciendo, lo tabata bon of no.

Un cantidad di mensahe di celular Ministerio Publico a haya como prueba den cual e tabata sinberguensa aki, tabata acosando su propio yiu p'asina e por a sasia su propio sed sexual, sin pensa un momento riba bienestar di su yiu muhe.

E pober criatura cu awo tin 13 año di edad, a wordo afecta grandemente pa e abusonnan cu su tata tabata impone riba dje loke mas cu claro a bin afecta e mucha emocionalmente manera entre otro con continuamente e tata R. tabata controla si e yiu a haya su regla pa asina e ta sigur cu e no a saca cu propio yiu na estado.

Fuera di e parti extremadamente tristo aki, tin cu mostra riba e echo cu den oranan di marduga e tabata manda mensahe



di celular pa e yiu puntrando cu loke nan a haci no tabata great y con e mucha a sinti su mes.

Ta un alma malo so ta haci e cosnan aki cu su propio sanger, ta un burdugo sin sentimento a hinca su mes den e situacion aki sin mostra ni un momento, un remordimento pa loke el a bin ta haci cu su propio yiu.

R.J. ta un acusado sin consenshi, un homber sin caracter y un abusado di marca mayor sigura ora cu tuma na considera kico el a haci cu su yiu for di momento cu esaki tabata 5 año.

Fiscal den nomber di Ministerio Publico a pidi hues pa condena R.J. na un castigo di prizon di 9 año largo, loke pa hopi hende simplemente NO ta suficiente pa e nivel di crimen cu el a comete contra di un criatura inocente y fuera di esey violando su propio yiu muhe!!

Ta di spera cu hues aumenta e castigo aki contra di e tata aki, ya cu pa loke el a haci, practicamente ningun castigo lo alivia e sufrimento cu el a pone tanto su yiu muhe como mama di e criatura aki pasa aden.